

LA NESTRE MUSE

Tal cuadri des Regjons e des Comunitâts Naturâls che a aderissin o no al grant moviment regionalist de Europe, il Friûl al presente une cundizion e une fisionomie nete, interie, distinte e, si pò dî, uniche, tant in confront des Regjons talianis come di dutis chês altris.

Di chestis Regjons e Comunitâts, une part a puedin puartâ come fundament des lôr aspirazions autonomistichis une situazion etniche che lis distache de raze e nazionalitât dominant: cussì la Scozie, la Cornovalie, la Frisie. Altris a àn ancje une lôr lenghe: i Kymris (Galês), i Bretons, i Provençâi, i Catalans, i Sudtiroloês. Altris nome la situazion gjeografiche: Sicilie, Sardegne. Altris nome la storie dai secui passâts: Trentin, Savoie, Palatinât e Stâts de Gjermanie, Altris inmò la messedance des razis: Alsazie, Vignesie Julie. Il Friûl lis à dutis insieme e cualchidune di plui. Il Friûl al è propit bessôl.

Il Sudtirôl al è par raze, par lenghe, par civiltât, par culture un bocon di Austrie; la Val d'Aoste e sarà un bocon di France; La Corsiche un bocon d'Italie, la Baviere, un bocon di Gjermanie. Il Friûl nol è un bocon ni di Austrie, ni di Sclavanie, ni dal Venit: al è nome Friûl. Nissun dai popui che i stan atôr nol fevele furlan, nissun altri nol à vût dut chel stes passât storic, nissun nol à precisementri chel temperament.

La Provence, la Catalugne, l'Euskadi (Païs Bascs de Spagne), la Galizie a àn diferencis di lenghe e di tradizions cu la nazione che lis comande: il Païs dai Walês e la Bretagne francese a àn ancje diferencis di raze, ma a son secui e secui che a vivin unidis ce cu la France, ce cu la Spagne, ce cu l'Inghilterra; e cheste union, sfuarçade o sopuartade o volontarie che e sedi, e je un fat che nol pò jessi trascurât e che al puarte lis sôs consequencis. La Furlanie e je diventade taliane part za otantetrê agns, part za trente; e je tra lis ultimis regjons vignudis a cjatâsi inte situazion politiche di vuê e, tra chestis, e je l'uniche che no partegni a un'altre comunitât nazionâl.

I Cjantons de Svizra a son di cuatri çocjis e di cuatri lenghis; ma gjavant i Grisons, che a son a pene cent mêl, si trate ancje al di frazionis di altris popui; dal francês, dal todesc, dal talian. Il Furlan al è un popul di bessôl, nol è une minorance alogjene, ma une piçule unitât complete, che anzit e conten minorancis di altris popui e par consequence e à la necessitât direte di stabilî une forme juste di convivenza cun lôr.

Economicementri e gjeograficementri il Friûl al fâs part de Italie continentâl e par cheste reson al sarès di mats pensâ di sglovâlu vie des

regjons talianis vicinis; ma ancje su chest pont, cu la varietât dal so teren e des sôs risorsis, cu la produzion complementâr tra montagne, culine, planure e litorâl, une volte che al fos metût in sest ancje il puart di Nuiâr e sistemade un fregul miôr la situazion industriâl, la nestre Regjon e rivarès a creâ une sô configurazion economiche no autosuficient, ma scuasi complete.

Cheste condizion specialissime dal Friûl - e i svilups che di alì a puedin nassi - a Rome e je stade capide fin dal principi e simpri e je stade tignude di voli. Juste apont di cheste "regjonalitât" nete e interie i guviers talians a àn simpri vude pôre; juste par chel a àn simpri fat di dut par inturbidîle, miscliçant la int e confundint lis delimitazions e lis ideis; juste par chel il guvier di cumò al à dât un ordenament speciâl ae Sicilie o al Sudtirôl ma no al Friûl; anzit al à spesseât a glotisi chel ricognossiment prejudiziâl che la Constituent intun moment di distrazion, si jere lassade scjampâ. Nol è di dî che Rome no si rindi cont di cheste nestre situazion cussì limpide: al è di dî che si rint cont ancje masse e che e sta in vuaite!

josef marchet - Patrie dal Friûl / 1949